

**Ն.Ա.Օ.Տ.Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ ԻԶՄԻՐԼՅԱՆ ԲԺՇԿԱԿԱՆ ԿԵՆՏՐՈՆԻ ԲԱՅՄԱՆ ԱՌԻԹՈՎ**

(15 հոկտեմբերի, 2013 թ.)

Մեծարգո նախագահ Հայաստանի Հանրապետության,

Միրելի բարեպաշտ զավակներ ,

Մեծ ուրախությամբ կատարեցինք բացման արարողությունը հիմնանորոգված «Իզմիրլյան» բժշկական կենտրոնի: Գոհունակություն է Մեզ համար անդրադառնալ, որ այս կարեւոր միջոցառմանը մասնակից է նաեւ Հայաստանի Հանրապետության նախագահ տիար Սերժ Սարգսյանը, ով իր բարձր եւ պատասխանատու առաքելության ընթացքին մշտապես մեծ գորակցություն ու կարեւոր աջակցություն է ցուցաբերում նաեւ բարեսիրական, խնամատար ծրագրերի իրականացմանը:

Միրելիներ, շուրջ մեկ տասնամյակ առաջ Հայկական Բարեգործական Ընդհանուր Միությունը Մայր Աթոռ Սուրբ Էջմիածնին նվիրաբերեց նախկին Պրոկտորոգիայի ինստիտուտը, որը տարիներ շարունակ դժվարին իրավիճակներում ծառայություններ մատուցեց՝ բարեկարգ պայմաններում գործունեություն իրականացնելու այս բերկրալի օրը հուսալով: Բժշկական կենտրոնի հիմնանորոգմանը մեծ ներդրում բերեցին մեր Սուրբ Եկեղեցու նվիրյալ զավակներ Տեր եւ Տիկին Տիգրան եւ Հելենա Իզմիրլյանները՝ որպես հիմնական բարերար, ինչպես նաեւ մեծագնիվ տիկին Լուիզ Մանուկյան Միմոնը իր սրտաբուխ բարերարությամբ կարեւոր նպաստ ունեցավ այս աստվածահաճո գործում: Մեր սիրելի բարերարները ազգային-եկեղեցական կյանքի բարգավաճմանն ու շինությանն ի խնդիր իրենց մեծագործություններին հավելեցին նաեւ առատաձեռն նվիրաբերություններով իրականացված այս հիվանդանոցի նորոգությունը, որը, ի հիշատակ բարերար Տիգրան Իզմիրլյանի լուսահոգի ծնողներ Սարգիս եւ Մարի Իզմիրլյանների, կոչվեց «Իզմիրլյան» բժշկական կենտրոն: Հիվանդանոցի վերանորոգմամբ եւ բարեկարգ պայմանների ստեղծմամբ գործունեության նոր սկիզբ է դրվում հոգատարության ու խնամքի այս հաստատության, որը հիրավի բազմաթիվ մարդկանց համար պիտի լինի «տեղի ապալինի եւ բժշկութեան»: Այսօր վերակերտյալ հիվանդանոցի բացումը կատարեցինք այս վստահությամբ եւ սպասումով, որ բժշկական հաստատությունը առավել արդյունավորությամբ շարունակի մեծ օգտակարություն բերել բժշկության կարիքն ունեցող մարդկանց:

Փառք եւ գոհություն Աստծո, որ Մեր զավակների առողջության, հոգածության ու խնամքի համար հնարավոր եղավ կյանքի կոչել «Իզմիրլյան» բժշկական կենտրոնի ստեղծման ազգօգուտ ծրագիրը: «Իզմիրլյան» հիմնադրամի աջակցությամբ հիմնանորոգված «Իզմիրլյան» բժշկական հաստատությունն իր մեջ ներառում է նաեւ «Սուրբ Ներսես Մեծ» գիտակրթական կենտրոնը: Հիվանդանոցը «Սուրբ Ներսես Մեծ» գիտակրթական կենտրոնով պիտի գործի Սուրբ Ներսես Մեծ Կաթողիկոսի կյանքի վրա օրինակով, ով իր առաքելությունը բարեգարդեց նաեւ խնամատար, բարեսիրական

գործունեությամբ եւ ամրապնդեց մեր Սուրբ Եկեղեցու սոցիալական ծառայության հիմքերը: Այս սկզբունքով «Իզմիրլյան» բժշկական կենտրոնը շարունակելու է մատուցել բժշկական ծառայությունների բարձր որակ եւ մատչելիություն, նաեւ բարեգործական սկզբունքով՝ ծառայություններ շրջաններում եւ քաղաքամայր Երեւանում սոցիալապես անապահով հիվանդների համար:

Մեր Տերը՝ Հիսուս Քրիստոս, Իր փրկչական առաքելության մեջ հատուկ ուշադրություն էր դարձնում նաեւ հիվանդների բժշկությանը, ինչպես վկայում է Ավետարանիչը՝ նշելով, որ Տերը քարոզում էր արքայության Ավետարանը եւ բժշկում էր ժողովրդի մեջ եղած բոլոր հիվանդությունները (Մատթ. Դ. 23): Մեր սուրբ հայրերը հոգու փրկության հետ մեծապես կարեւորել են երկրային այս կյանքում մարմնի առողջության համար հոգալը: Մարդու կյանքի եւ արդյունալի գործունեության նախապայման է առողջությունը: Քրիստոս ասում է. «Հոգին առավել է, քան կերակուրը, եւ մարմինը՝ քան հագուստը» (Ղուկ. ԺԲ. 23): Մեր Տիրոջ վարդապետության կարեւոր ուսուցումներից է ներկայացնում ավետարանական այս խոսքը, որով Քրիստոս հոգեւորի հետ մեկտեղ նաեւ մարմնի մասին է հիշատակում: Հիրավի, պարտավոր ենք հոգեւորն արժեւորելով մարմնի մասին մտածել, առողջության համար հոգալ, քանզի մարդը միայն հոգի չէ, եւ ոչ էլ սոսկ մարմին, այլ այս երկուսի միավորությամբ է՝ ստեղծված աստվածային պատկերով եւ նմանությամբ: Դրա համար Սուրբ Եկեղեցին հոգու փրկության առաքելության իրականացմամբ մշտապես կարեւորել է նաեւ մարդու ֆիզիկական առողջության համար հոգատարությունը, քանզի աստվածաշնորհի կյանքը բարի գործերով առավել կարող ենք արժեւորել, երբ գորել ենք առողջությամբ:

Միեւիներ, «Իզմիրլյան» բժշկական կենտրոնի բացման այս ուրախալի առիթով վերստին Հայրապետական Մեր բարձր գնահատանքն ենք բերում սիրելի բարերարներին, բացման այս արարողությանը ներկա հարգարժան Տեր եւ Տիկին Տիգրան եւ Հելենա Իզմիրլյաններին, «Իզմիրլյան» բժշկական կենտրոնի հիմնադրողգման նախաձեռնությանը մեծ օգտակարություն ցուցաբերած տիար Գրեգորի Զերեջանին, «Իզմիրլյան» հիմնադրամի երեսանյան գրասենյակի տնօրեն տիար Տարոն Առաքելյանին, բժշկական կենտրոնին բազմաբնույթ աջակցություն եւ նվիրատվություններ տրամադրած բոլոր անհատներին ու կազմակերպություններին: Հայրապետական առանձնակի գնահատանք ենք հայտնում հիվանդանոցի հոգեւոր տեսուչ Գերաշնորհ Տ. Տաթև արքեպիսկոպոս Սարգսյանին, ով Մեր ներկայացուցիչն է այս հաստատությունից ներս եւ հոգեւոր խնամակալություն է իրականացնում, ինչպես նաեւ՝ հիվանդանոցի նախկին եւ ներկա տնօրեններին նախանձախնդիր աշխատանքի համար, եւ տնօրենների խորհրդի պատվարժան անդամներին, ովքեր իրենց խորհրդատվությամբ ու թելադրություններով ուղղորդեցին կազմակերպելու հիվանդանոցի կառավարման գործընթացը: Մեր գնահատանքը նաեւ բժշկական կենտրոնի նորոգությունն իրականացրած «Այգեձոր» ընկերությանը, ճարտարապետներին եւ հիվանդանոցի վերանորոգման գործում իրենց ջանքերը բերած բոլոր անձանց: Մեր գնահատանքն ու օրհնությունն ենք բերում հիվանդանոցի

քաջեռանդ բժիշկներին, ովքեր նվիրյալ ծառայությամբ ու ջերմ սիրով մեր ժողովրդի կյանքում կարեւոր ու անփոխարինելի առաքելություն են իրականացնում: Մեր Հայրական հորդորն է՝ ծառայասիրության ոգով տոգորված սիրելի բժիշկներին, «Իզմիրյան» բժշկական կենտրոնի աշխատակիցներին՝ նախանձախնդրությամբ շարունակեք ձեր աստվածահաճո գործունեությունը, հոգատարությամբ ու խնամքով նորոգելով կյանքի ուրախությունն ու խնդությունը ապաքինման կարոտ անձանց:

Աղոթում ենք, որ Տերը գորացնի ամենքիս, հատկապես՝ մարմնական տկարություն ունեցող բոլոր անձանց, խաղաղ պահի Հայրենի մեր երկիրը, շինության ու առաջընթացի մեջ՝ աշխարհասփյուռ հայ կյանքը: Թող Աստված օրհնի եւ արգասավորի աստվածահաճո առաքելությունը «Իզմիրյան» բժշկական կենտրոնի:

Մեր խոսքի ավարտին անհուն գոհունակությամբ բարերար տիար Տիգրան Իզմիրյանին շնորհում ենք տիտղոս «Ասպետ Սուրբ Էջմիածնի» եւ Հայրապետական շքանշան՝ ազգային-եկեղեցական անդաստանում իրականացրած ազգանվեր ձեռնարկների համար՝ մաղթելով սիրելի բարերարին քաջառողջություն, արեւշատություն, գործոց մշտանորոգ հաջողություններ եւ Բարձրյալն Աստծո Ամենախնամ Սուրբ Աջի հովանին:

Շնորհք, սէր եւ ողորմություն Տեառն մերոյ Յիսուսի Քրիստոսի եղիցին ընդ ձեզ եւ ընդ ամենեսեան. ամէն: